

বিভাগ অনুযায়ী মেডিকেল কলেজগুলোকে মেডিকেল বিশ্ববিদ্যালয়ের অধীনে আনা হবে : স্বাস্থ্যমন্ত্রী

নিজস্ব বার্তা পরিবেশক

দেশের মেডিকেল কলেজগুলোকে বিভাগ অনুযায়ী মেডিকেল বিশ্ববিদ্যালয়ের অধীনে নিয়ে আসার উদ্যোগ গ্রহণ করা হচ্ছে বলে জানিয়েছেন স্বাস্থ্যমন্ত্রী মোহাম্মদ নাসিম। তিনি বলেন, ঢাকা বিভাগের মেডিকেল কলেজগুলোকে বঙ্গবন্ধু শেখ মুজিব মেডিকেল বিশ্ববিদ্যালয়ের (বিএসএমএমইউ) অধীনে নিয়ে আসা হবে। চট্টগ্রাম ও রাজশাহী অঞ্চলের কলেজগুলো যথাক্রমে চট্টগ্রাম মেডিকেল বিশ্ববিদ্যালয় ও রাজশাহী মেডিকেল বিশ্ববিদ্যালয়ের আওতায় চলে আসবে। এর ফলে কলেজ পরিচালনার কাজ আরও স্বচ্ছ ও সহজতর হবে।

গতকাল অঙ্গ প্রতিস্থাপন বিষয়ক জাতীয় সম্মেলন ও বৈজ্ঞানিক অধিবেশনের উদ্বোধনকালে তিনি এ কথা বলেন। বঙ্গবন্ধু শেখ মুজিব মেডিকেল বিশ্ববিদ্যালয়ের (বিএসএমএমইউ) মিলন হলে সোসাইটি অফ অরগান ট্রান্সপ্ল্যানটেশন বাংলাদেশ এ সম্মেলনের আয়োজন করে। সোসাইটির সভাপতি অধ্যাপক হাকুন-উর রশীদের সভাপতিত্বে অনুষ্ঠানে অন্যদের মধ্যে বিএমএ সভাপতি ডা. মোস্তফা জালাল মহিউদ্দিন, বিএসএমএমইউর উপাচার্য অধ্যাপক ডা. কামরুল হাসান খান, স্বাচিপ সভাপতি অধ্যাপক ডা. ইকবাল আর্সলান, স্বাচিপ মহাসচিব অধ্যাপক ডা. এমএ আজিজ, ভারতের বিখ্যাত অঙ্গ সংযোজন বিশেষজ্ঞ ডা. সুনীল শ্রফ বক্তব্য রাখেন।

স্বাস্থ্যমন্ত্রী বলেন, সরকার পর্যায়ক্রমে চোখের লেন্সসহ বিভিন্ন মেডিকেল ডিভাইস সংযোজনের মূল্যও নির্ধারণ করবে। হার্টের রিংয়ের নির্ধারিত মূল্য কার্যকর করে সাধারণ মানুষের স্বাস্থ্য সেবা প্রাপ্তির পথ সুগম করতে চিকিৎসক, ব্যবসায়ীসহ সংশ্লিষ্ট সব পক্ষের প্রতি আহ্বান জানিয়ে মন্ত্রী বলেন, দেশের সিংহভাগ মানুষ দরিদ্র ও মধ্যবিত্ত। জনগণের সরকার হিসেবে এ বিশাল জনগোষ্ঠীর সাধের মধ্যে আধুনিক চিকিৎসাসেবা নিয়ে আসার লক্ষ্যে সরকার এ পদক্ষেপ নিচ্ছে। জনগণের স্বার্থেই সবাইকে এ উদ্যোগে সহায়তার হাত বাড়াতে হবে।

দেশের ব্যয়বহুল বড় হাসপাতালগুলোতে গরিব রোগীর ডায়াগনস্টিক ও চিকিৎসা ব্যয় সাশ্রয়ী মূল্যের মধ্যে রাখার জন্য পুনরায় আহ্বান জানিয়ে স্বাস্থ্যমন্ত্রী বলেন, দরিদ্রদের জন্য বিশেষ সাশ্রয়ী মূল্য নির্ধারণ করলে তারা আধুনিক চিকিৎসার আওতায় চলে আসবে। একটি হাসপাতাল যদি ১১শ' টাকায় ডায়ালাইসিস সেবা দিতে পারে তবে অন্যদেরও তা পারা উচিত।